

Ч. 6. (90.)

Крыница, четверг дня 13. лютого (31. січня) 1936.

Рок III.



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко” Крыница.

Всіх читателей, котры не впустили ище пренумераты, просиме выровнати якнайскорше рахунки.

Ище ест на складі **Календар „Лемка”** на 1936-ый рок.

Ціна одного календара выносит **50 гр.** При замовленьях 10 календарей оплату почтову платит редакция.

Пренумерата в краю:
30 грошей місячно,
80 „ квартално
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:
Ціла сторона 120 зл., 1/2 сто-
роны 60 зл., 1/4 стороны 35 зл.,
1/8 стор. 20 зл., 1/16 стор. 10 зл.;
оголошения малы за 1 мм. 20 гр.,
в тексті 30 гр., перед текстом
40 гр. При місячном и долшом
оголошеню значна знижка.

Контото чековое Нр. 404.155.

Старайме ся о хліб для наших дітей!

Всі, крім наймолодших, памятаме нашу емиграцию перед войном. Толпы народа выїзджали втотчас с наших гор за море, толпы каждой весны ишли на заробок до Німеччины, Венгрии и других краєв.

Знаючы тых справ обчисляют, же перед войном выїзджало рочно с цілою терытории теперешной Польши до других краєв около 300 тысяч народа.

Емиграция тота была емиграциом поселенчом. Люды тоты выїзджали на все, безповоротно, або на долги літа.

Поза тым была ище имиграция поворотна, сезонна от весны до осени. На весну выїзджали ся хмари работников „на Мадяр” або „на Саксы” и число их выносило рочно около 600 тысяч люда. Тым способом рок рочно близко миллион людей находило заробок в чужих краях. Американскы доллары и німецкы марки плынули до краю и неоднo господарство двинуло и розвинуло ся за заграничны гроши.

Так як руснакы и полякы емигрировали так-же талияны, ирландцы, а с поза Европы японцы и кытайцы.

Так представляла ся емиграция перед войном. Война, як нам відомо, перерізала емиграцийный рух. В часі войны ишло лем кус проїдисвітов до Німеччины.

По войні отжила зараз емиграция и люды почали шиковать ся знова до выїзда. Але скоро показало ся, же не буде тото уж так легко, як передом. Перед войном не было ограничень. Кто лем мал гроши на дорогу и не был каліком, мог сміло выбирати ся в дорогу. Тепер річи грубо ся змінили. Передовсем Сполучены Державы Полноч-ной Америкы ограничили вїзды новых емигрантов, бо в американских фабрыках введено в часі войны масу техничных улуч-шень в машинах и нароблено таку масу

припасов, же не потреба было новых рук до работы. Побита и схудобніла Німеччина начала обходити ся переважно своим работ-ником. Правда, отворил ся по войні новый край — Франция, а также до Палестыны почало выїзджати кус жидов.

Емиграцийный рух по войні упал сильно. Але и так в перших 13-ох літах повоенных до самой Америкы Полночной и Полудне-вой выїзджало с Польши около 50 тысяч рочно, до Німеччины на полевые работы около 100 тысяч, до Франции пересічно 45 тысяч, так, же около 200 тысяч людей на-ходило хліб поза границами Польши.

Аж крызыс повздержал знова емиграцию, подобно, як давнійше война. От р. 1931. заткали ся праві всі рынky нашей емигра-ции: Америка, Німеччина и Франция. Емиграция змаліла в послідных пару літах до двадцет килькох тысяч рочно. Ест то число при перешло тридцет миллионном на-селеню барз ничтожне.

Повздержанє емиграции отчуло в пер-шой мірі село, а особенно наше горске, лемковске село, где не было хаты, с кот-рой бы ктоси не выїхал до Америкы.

Мусиме числити ся с тым, же рух емигра-цийный до чужих краєв змаліл и стратил для нас значенє. Може ся он увеличити в слідующих літах, але не досягне уж николи передовоенных розміров. В виду того му-симе глядати инших жерел доходов и инших способов даня работы увеличаючому ся населеню.

Правительство старат ся оживити госпо-дарку державы и через декреты поробило ку тому приготавленя. Належит ся споді-вати дальших посунень. Може на весну начнут ся великы работы публичны, — на дорогах, мостах, при будові великих пуб-личных домов. Разом с тым може оживи-

ти ся работа в фабрыках. Того може нам ульжити, але не поможе и не выстарчит. Село мусит сотворити у себе сталы зароб-кы, котры повинни дати тото, што давно давала емиграция. Тота мысль мусит за-пустити сильны корені в головах нашего населеня. Передовсем насуват ся ту розвите годовлі овец, поправа полян, лук и пасо-виск горских и розвите ріжных родов на-родного промысла по сельских хатах.

Позатым мусиме все старати ся о здобы-тє добрых колонизацийных теренов, где бы могла емигривати безработна надвыжка нашего населеня. Тепер ніт возможностей здобыти такы терены, але в часі, коли ста-не ся тота справа актуальна, наше прави-тельство мусит памятати о том, же увели-чающий ся стало прирост населеня мусит найти отплив, если не хочеме дспустити до того, штобы нашому поколіню грозил голод.

Ище о оплатах торго-вых, убойняных и т. п.

Уж от пару літ бесідує ся о тых преріж-ных оплатах, побераных через міста. Были уж случаи т. зв. „штрайков” против тым оплатам. В послідстві численных протестов сельского населеня наконец штоси начали робиги. Державны власти выдали ряд за-ряджень, за нима пошли обіжники и ин-струкции и под примусом тых приказов за-ряды міст приступили до обнижки оплат, а гдекоты с них нпр. „рогаткове”, были знесены.

Не всядиль однак зарядження властей бы-ли точно выполнены. Прото Министерство внутренних діл выдало ище одну инструк-цию, в котрой безвзглядно поручат окончене цілой акции до 1. квітня т. р. Выдана ин-струкция пригадує ище раз, же бюджеты городских предприятий (торговицы, убойні

(шляктузы) и т. д.) удержованы с оплат, мають бути виділені с загальних бюджетов міст и же побераны оплати мають покривати лем кошты тых підприємств.

С того выникат, же тоты підприємства не можуть бути жерелом доходів на загальні цілі міста.



Улучшити державну администрацию могут лем живы мыслячи урядники, а не бюрократычны автоматы.

Штораз частійше зустрічат ся в газетах наріканя на державну администрацию, котры свідчат о том, же народ интересує ся живо том справом. В послідных тыжднях так на тлі дискусии в Сеймі о коштах удержання администрации, як и с причины уявлення докучливых практик административно-бюрократычных, справа отбюрократизации администрации набрала в публичной опинии особенной актуальности.

В таком часі, при таком напруженю заинтересованія, єст доконче потребне почути, яку позицію в той справі занимає правительство. Голос правительства почули мы при розсмотряню и обсуджаню бюджета Министерства внутренних діл и треба признати же обалят он неспокой о будущность нашої администрации, если лем основы и наміреня, выголошены через п. Министра Рачкевича будут належито зрозумлены и зреализованы.

Выходячи с основанія, же ціла организация администрации, то лем рамы, котры своим діяльністю выполняют человек, — министр Рачкевич сказал, о якого человека ходит и што ся робит, чтобы администрация мала такого человека. Мусит то быти передовсем человек, для которого державна служба буде все жерелом гордости и удовлетворения. Стремленем со стороны Министерства єст обезпечити урядникови потребный покой и пучутє певности и тяглости работы. Але с другой стороны бюрократизм,

легкомышленне спыханє и позбытє ся справ, — все, што доказує не лем недостаток почутія обовязка, але зраджат недостаток гражданского наставления, недостаток почутія вырядженой населеню кривды, буде безмилосердно и цілковито выкоренене.

Спеціальну увагу Министр посвятил справі наплываючих до администрации новых сил. Ту—заявил, же почуват ся до обовязка, чтобы выховати их в новых методах работы, хоронячи от пересадного бюрократизма и закостнения в урядничой рутині. Новочасна администрация не може ограничити ся лем до мертвого перестеріганя приписов. В участи ей мусит припасти безпосередне сотрудничество с житєм общественным.

Як с тых основных мыслей, высказанных министром Рачкевичом о задачах администрации видно, — найде в них каждый гражданин того, чого мог бы жадати в своем, загалу и державы интересі.



Мордуют в церквах и в часі богослужень.

Рускы и польскы газеты доносят, што в послідных часах в містечку Журавні и селі Дубравка (около Журавна, повіт Жидачев над ріком Свічом в церквах дошло до кровопролитія в часі богослужень.

И так на Йордан в Журавні, коли оден из членов читальні им. Качковского хотіл взяти церковну хоругву, чтобы участвовати в процесии, килькох хулиганов шмарило ся на него с ножами и в церкви его тяжко побили и порізали.

Того самого дня в Дубравці святили воду на ріці Свічи, где уставлено крест. Коли оказалось ся, што в послідной годині украинцы крест тот обвішали украинськими лентами, рускы жителі Дубравки крест тот украсили также троцвітными лентами. Коли

увиділи того украинцы, хулиганы начали сейчас в часі водосвятія здерати из креста троцвітны ленты, а тых, котры их припняли, порізали ножами.

Калужи русской крови были знаком, в котром місци свячено в Дубравці на Йордан воду. А парох-украинец, Недільский, лем ся под носом подсміхал и не лем не старал ся утихомирити хулиганов, але лице его сияло радостью, што таку науку достали „кацапы“.



Новый чисто-украинский церковный стиль.

В 46. числі „Украинского Бескида“ Иван Филиппак, видный украинский писатель из клерыкально-гетманского табора описує в статі „Дві культуры“ монастыр Василиян в Лаврові и монастыр в Жолкві. О церкви монастырско-василианской в Жолкві, а особенно о картині вымальной в третьей бані (копулі) над хорами пише автор так:

„Це щось славно-оригінального, якого не побачимо ніде, ні во Львові ні в Києві. На склепінній копулі образ Покрови, а під і ї омором зібрали ся всі чільні діячі, одні на тлі Києва, другі Львова. В середині бачимо групу наших Владик і Василианских Достойнииків з Митрополитом гр. Шептицьким на чолі.

У стіп Митрополита клячят похилена обдерта жінка з трупом виголодженної дитини, що уявляє собою недолю України. З правої стороны на тлі Львова стоит група галицьких діячів: Романчук, Барвінский, Оленицкий, К. Левицкий, Петрушевич, Б. Лепкий, Дм. Вітовський, Олена Степанівна, проф. Боберский, що несе в руках сніп пшениці — як символ зібраних плодів праці, а біля нього український пластун, там далі навколішках сурмач УСС. По лівім боці на тлі Києва бачимо групу діячів зі Східної України: М. Грушевського, С. Петлюру, Гатьмана

ПИСМО СВАТА АСАФАТА.

(Продолженє)

Конец войны. Революция в России и на Украині — Німцы выслали в запечатованом вагоні Ленина и инших большевиков до России. Перший вожд російской революции Керенский не потрафил ся дольше утримати, большевики го перемогли. А на Украині тыж революция. Здавало ся, же як сорокмилионовый народ повстане — жадна сила го не переможе. Каждый думал же Украина стане як мур. — Но и напавду политики зачали будовати „Самостійну“ а народ або цілком ся не интересовал, або смотріл, што буде дальше, — бо в „Самостійну“ не вірил и политиков украинских добре знал. — Была Директория, был и гетман Скоропадский, были Сусусы, был и Махно — а „Самостійной“ Украины не было и ніт. И здає ся не буде.

Але у нас украинцы сут. — Провадят дальше политику. Одны так, другы иначе. Одны сидят в Сеймі и в Сенаті — другы в Бригидках и в Березі. С одними пертрактуют — других судят — Што с того выйде, не знати.

По тамтой стороні Збруча — наши Украинцы нич не годни зробити — там ніт што „самостійно“ думати — а уж бесідовати або робити — хвань Боже! там не жартуют. За то по нашої стороні иначе. „Стыхийна“ украинска сила пре на нашу Лемковину. Хотят защебити нам мазепийский яд. Тяжко им то иде, але иде. Дакотры лемкы токой называют себе украинцами. Хвала Богу не дуже их. Я ся негоден надивовати, як то человек, што уродил ся лемком-руснаком — може статити ся украинцом. — Мі ся выдає річ неможлива, а што больше, мизерна и глупа. Лемко може ся с американизувати, знімчити, змадяризовати, сполячити, видит в тых народах даку культуру, историю — импонуєт ему дачим. А ту ни так, ни сак.

Як Муссолини вмовил в талиянов, же сут римлянами — же мають панувати над світом, так украинцы, значит верховоды, вмавають в бідный русский народ, же сут украинцами и же збудуют Украину от Татр по горы Кавкаскы. И єст дуже таких людей, што в того свято вірят. А самы верховоды не вірят, але хотят мати людей безкрытычных в руках. И знам одного Лемка, выхованого на украинском погною, правда, сам он полинтелигент, має ремесельничу школу — тот мі повідат раз и то совсем поважно не жартує: гварит, „Перестанте читати „Лемка“ и тот бідный темный народ най перестане читати газеты рускы, бо як Украина настане, то горе вам буде! Будеме бити і вішати“. — Но, повідам жартом, може так нагло Украина не повстане, може, реку, буде час втечи дагде на Венгры або до Басарабы. Нич на того не повіл, але видно было, же сой подумал: „якы мы Руснакы бідны, же не розумієме его.“

Часы планны. — Штоси ся сопсуло на світі. Народы дусит кризи. Державы збоят ся, хыбаль не до парады лем до войны. Война уж єст — правда далеко от нас — але може скоро и ближе зачати ся. Народы ся ненавидят, оден над другим хоче запанувати.

Галицкы украинцы — верховоды, мають зас надію — на Німца — Японию. Дакотры с них уж мають министерскы текы на всякий случай.

Пожиєме — увидиме што с того буде. В каждом разі наша Лемковина не прилучит ся до Украины.

Може даколи погодивше — чом бы ніт — усусы заведут гавптваху на Кремлю. Втотчас то уж вздолж Сяну треба збудувати кытайску стіну значит хинский мур.

Асафат Потыкач.

Скоропадського, за ними стоять генерали и отамани: Юнаків, Павленко, Безручко, Тютюник, а далі старий козарлюга-символ відвічного Бояна з розбитою бандурою (а може головою — прим. складача). А біля нього навколішках Леся Українка, а взнесши руки до гори, своїм пророчим духом проповідає, що кривда зроблена нашому народові, буде скоро направлена...

Варта поїхати раз в житю до Жовкви, щоби це чудо побачити."

Так адже виглядат тота картина, котра по словам Филипчака представляє цілу українську історію за останніх 50—60 літ.

Интересно знати, ці медже владыками и василиянськими достойниками єст и славноизвістный патентованый (ореченєм лікарей психиатров) варият, бывший Василяннин, амерыканський єпископ Сотер Ортынський и єпископы православны, Поликарп и Алексий, заслужены украинизаторы волинской и поліської єпархії, бо єст група православных генералов и гетманов, то до компанії медже Шептыцького и Ортынського аж ся просило всадити православного єпископа Алексія.

В групі „діячів” западной України бракує ище поруч К. Левицького єго колеги Николая Василька, найбільшого українського шантажиста, а одночасно місто-предсідателя українського клубу послов віденського парламенту, а уж штобы образ был совсем полный и выразистый, треба было ище и „полковника” Евгена Коновальца и хоцбы Грыца Мацейку, яко боєвника-символ стріляючого до якого министра."

А єли могли жолковскы Василяне погидити Петлюру со Скоропадським (бо Украинский Бескид" неменше от них католицкий и патриотичный такой штуки ище не втне), то уж до компанії той могли додати и „батька Махна" и великого українського політика Севрюка. Тогда можна бы сказати, што на картині той представлена історія українського сепаратизма во всіх єго формах и явленях и то до останніх літ.

Ци однак варта аж до Жолкви їхати, штобы таке „чудо" видіти, в того барз ся сумніваме, бо каждому здорово думуючому чоловіку выстарчит докладный опис того „чуда", и хыбаль хвора фантазія Івана Филипчака и видит в том „чудо", котре вартат того, штобы єго оглядати.

Здає ся, што Іван Филипчак лем и мріє о том, штобы жолковскы Василяне и єго „обличча" домальовали на той картині, хоцбы „навколішках біля" Сотера Ортынського.

СЕЛО ВАПЕННЕ, ПОВ ГОРЛИЦКОГО.

Дня 26. н. ст. січня состояло ся загальне дорочне собранє читальні им. Качковского в Вапennom.

Кромі членов явило ся много участников из Вапennого и Мацины Вел. Из Горлиц приїхал Др. Сьокало.

Вписало ся новых членов 17. В состав нового выдїла читальні выбрано: предс. Даміяна Бубняка, містопред. Григорія Прышташа, членами выдїла: Юрка Бодака, Ореста Пыжа, Петра Колтка. На собраню говорило ся о справі поширення господарчої культуры и оживлення общественного житя в читальні.

Прекрасно деклямовали хлопцы: Роман Пыж с. Петра, Милько Прышташ с. Грица, а всіх перевышила Стефания Сембрат. Всі они оживили собранє, произносячи патриотичны верши.

Хоц невелике село єст Вапенне и нїт там интеллигента, котрый бы поддержал читальню, то все же дотеперешна ліятельность читальні и участь молодежи в общественном житю села єст доказательством, што населєнє Вапennого єст свідоме своєї ціли и привязане до рускости.

Участники собраня, выбираючи председателем читальні Д. Бубняка, надіют ся, што читальня под єго управленєм ище вєще буде ся розвивати и приступит до будовы своего дому.

СЕЛО БІЛИЧНА, ПОВ. ГОРЛИЦКОГО.

Дня 26.І. т. р. отбыло ся загальне дорочне собранє членов чит. им. М. Качк. в домі Юліяна Адамяка. Собраны под председательством Юліяна Адамяка вычерпали програму и до нового выдїла выбрано: предсід. Осифа Кунцика, містопредс. Василя Бреяна, секретарем Юліяна Адамяка, касиєром Стефана Куницка, бібліотекарем Николая Избанского, заступниками: Іоана Ксенича и Антонія Нимаша. До контрольной комісії выбрано: Константина Лыбу, Луку Барылика, Стефана Дзядыка.

Читальня числит 40 членов, што єст барз дуже, єли возме ся под увагу, же в селі нїт больше як 40 хат. Видно, же Білична, хоц невелика, не остає позаді в культурной роботі. Честь и слава им за то!

ВЕРХОМЛЯ ВЕЛИКА, ПОВ. НОВЫЙ-САНЧ.

В неділю 26.І. 1936. о год. 5 попол., в присутности делегата Центр. О-ва им. М. Качковского, рев. О. Яновицького, отбыло ся загальне собранє членов читальні им. М. Качковского. До нового выдїла выбрано: председателем — Венедыкта Русиняка, заст. председателя — Николая Дзюбинского, секретарем — Константина Богуского, касиєром — Атаназія Мійского, бібліотекарем — Пантелеймона Гнатышака, на заступников: Симона Юрця и Осифа Русиняка ч. д. 102. До контрольной комісії вошли: Осиф Русиняк, Константин Юрик и Стефан Мійский. Членський взнос на 1936 р. установлено в высоті 15 гр. місячно. Член чит. Осиф Русиняк выразил пожеланє, жебы новый выдїл зберал частійше собраня членов, робил доклады и давал информации.

По оконченю собраня вечером в селянской красно прибраной зеленином и портретом бл. п. М. Качковского хыжі — на сцені отограно місцевыми членами аматорского кружка, пєсу-драму с народного житя „Западня" пера д-ра Н. Ваврика. Ролі отограли: Максима Козака — Антоний Богуский, Івана Грабара — Ваньо Русиняк, Мелянии, жены Грабара — Меляния Цидило, Соні — Мария Русиняк, Василька — Емилиан Русиняк, Романа — Афтанасий Русиняк, Галактиона-писара — Пантелеймон Гнатышак, Вилюся и Филюся-надувателей: Ваньо Богуский и Гавриил Гнатышак, Сидонию и Язю-панны міщанкы: Мария Дзюбинска и Анна Урда, Хаима-жида — Владимир Мешель.

Всі акторы отограли свои ролі барз красні и представили публичности, котра переполнила невелику селянську хыжу, правдиво всі выведены автором особы и тыпы. Режисером и суфлером был Осиф Русиняк. По оконченою пєсы хор, под упр. Русиняка выконал ряд русских пісень.

Присутный делегат Центр. О-ва г. Яно-

вицкий звернул ся до всіх собраних со словом захоплення для прекрасной игры, подчеркнул велике значенє чит. им. М. Качк. в житю села и нашего народа и завозвал молодеж вступати масами в члены читальні и ити слїдами Просвітителя Галицкой Руси бл. п. о. Іона Наумовича, беручи єго девизи: Моли ся, Учи ся, Труди ся, Трезви ся, яко указаня для каждого русского человека. В конці подяковал всім потрудившим ся на благо читальні: выдїлови и кружкови аматоров.

На законченє хор и присутны проспівали гимн: „Пора, пора за Русь..." и перешли до другой хыжи, где до рана бавлено ся при музиці и танцах.

За оден рок работы Выдїл чит. потрудил ся над розвитєм чит.; отограно 4 пєсы дано килька забав, переведено коляду. Пожертвовано на справу процесу новосандецкой бурсы 10 зл. и т. п. Бракує верхомлянам своего власного дому-барака. Новый выдїл повинен тоту справу взяти близко до сердца и начати зберати фонды на будову чит. дома.

Сусідне село мале — Верхомля мала, выдючи успіх чит. работы, выразило также желанє основати у себе руску чит.

На другой день отбыло ся засіданє нового выдїла чит. и рішено основати в селі также кружок Р. Р. Союза.

Честь и слава Вам, верхомляне, дай Бог счастья в Вашей народной работі.

Доброжелатель.

ЕЙ ЧАСЫ, ЧАСЫ.

Добры часы — же аж мило,
Снігу мало, сонце гріє,
Хоц што, реку, потуніло
И каждый ся с біды сміє.

Хоц не маме посла своего,
Ани своего учителя;
Добре нам єст, присям Богу,
И гет люды ся веселят.

И свята мы мали гарды,
Хоц без виски, без гарбаты,
Без колбасы, без муштарды,
Але шумны были свята.

Хоц не оден ходит босо
И локтями хоц-кто світит,
Никто уж не крутит носом,
На всьо треба ся згодити!

Закурил бы чловека часом:
Хоц ковбой — або шпорта.
Але планно, реку, с касом
Вмісто грошей то маш чорта!

Кредыту уж нигде нема
Ани в своих, ани в жида.
И хоц крызыс ся уж кончит,
То зачинат ся зас біда!

С в а т.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО"

Што чути в світі.

Атени: Дня 31 січня помер нагло знаний бывший диктатор Греции, генерал Кондылис. На конференції с послом Меркурисом, с котрым огварял возможность уладження парламентарных діл, ген. Кондылис достал атак и по коротком часі упал мертвый на землю. Беспосередном причиною смерти генерала был аневризм сердца. Заряджено секцію тіла, што послужило до поголосок о отрутю генерала.

Льондон: Новый король английскый Едварт VIII. по поводу поступления на престол принял всі найвыши военны рангы: великого адмирала, фельдмаршала и маршала войск воздушных.

Парыж: Францускы власти отказали в продолженю побыта роботникам и горникам польским. В tych днях має вернути до Польщи 1200 роботников.

В Болгарии єст так тепло, як в часі весны. Такой температуры не нотовано там от 50 літ. На овочевых деревьях появили ся пупкы, а дерева сливовы, мигдаловы и ружи покрыли ся квітєм.

В Атенах раскрыто заговор офицеров на короля Греции. Напад мал быти выконаный в часі похорону ген. Кондылиса.

Тырава: Альбанскый король Зога выдал зарядженє, же женщины с заслоненым лицом не могут показати ся публично. Тото не сподобало ся магометанам, котры выкликали в килькох місцевостях розрухы, в часі котрых нападали на женщины отслонены, били их и навет ранили ножами.

Льондон: Англицке правительство намірят поднести чисельный стан армии до $1\frac{1}{2}$ миллиона вояков, т. є. до стану, якый Німеччина хоче осягнути с весном 1936 р.

Вашингтон: Доносят, же тайна полиция арестовала 3-ох анархистов, котры жили в Вашингтоні от 14-ох дней, ждучи на надающий ся момент до убия президента Рузвельта. В помешканю одного с них, италиана амерыканского Пиглоти найдено бомбу о великой выбуховой силі и великы припасы оружия.

Рим: Италианске военне министерство расписало мобилизацию и покликую новых десят рочников до войска,

Берлин: Амбасадор польскый в Берлині Липскый зложил протест против бесіди президента Банка німецкого д-р Шахта выголошенной 28.І. в Бытомі. В бесіди той д-р Шахт заявил, што версаальскый трактат єст одыноком причиною трудного положеня Шлеска и выказал надежду, же скоро направи́т ся кривду, яку вырядил Німеччині тот трактат.

Аддис-Абеба. Як відомо рас Деста програв бой с генер. Грацияни. Негус лично zdeгpадовал єго с начальника войск. При той церемонии негус, одітый в червено білу тогу и окруженный кордоном войска при звуках бубнов, отобрал меч от раса Десты, поламал єго и поламаны части шмарил на землю, причом негус плюл на землю. По

оконченю того смутного обряда воякы выдали авацийны окрики в честь негуса.

В Льондоні выбухнул штрайк на мясной биржі. Дає ся отчути недостаток мяса.

В Будапешті власти арестовали знаного комуниста Жигмонта Киту, котрого не давно выслал до Венгрии Бе́ля Кун. Кита заявил при слідстві, же с порученя Москвы має быти поднята сильна офензыва пропагандова против Венгрии.

Токио: Великы снігы, якы упали в Токио и других містах Япоии, перервали електричны проводы и улицы в ночи были темны. Рух в tych містах замер совсем. Снігы вырядили великы шкоды.

Льондон: Англицке правительство рішило приступати до великой фабрикации газовых масок. В том року ище маю́т фабрыкы выпродуковати $1\frac{1}{2}$ миллиона масок. Кажде місто и село буде мусіти мати магазыны с масками.

Аддис-Абеба: С жерел абисынских подают, же місто Макале не змогут италианы удержати. Місто єст окружене войсками абисынскыма. Абисынцы перемінили корыто рікы, переплывающей через Макале, позбавляючи таким способом Макале воды.

Гельсингфорс: В приступі нервозного розстройства с окна 4-го поверха выскочил оден 45-літний урядник банкый, котрый важил 107 кг. и упал на переходячу дорогом супружу пару. Всі троє понесли смерть на місци.

Токио: В кругах войсковых японских бесідуют, же переговоры совітско-англицкы, ведены тепер в Льондоні, мусят приспішиты войну російско-японску, бо Японпя мусит предприняти рішительны крокы, заклія Совіты загварантуют собі англицку помоч.

Вісти с краю.

Варшава: Дня 25. січня т. р. переїзджал через Варшаву до Льондона на похорон короля Юрия V. маршал Совітской армии Тухачевскый.

Страшный злочин в Закопаном. Дня 12 січня т. р. урядник с Варшавы Стефан Ды-

льон выїхал на нартах в Татры и уж не вернул. Оказало ся, же пал он жертвом убийства со стороны дезертера Стефана Гренды, котрый дня 30 грудня украл с войска карабин с патронами и першпективо (льорнетку), утек с войска и прибыл дня 10 січня до Закопаного.

Дня 12 січня напал он в горах на нарту-ючого ся Дыльона, казал єму роздіти ся и обернути до стіны. Пак Гренда отошол пару кроков и стрілил 2 раз, кладучи єго трупом на місци. По преступленю переоділ ся Гренда в одеджу Дыльона, забрал мугроши и утек до Бельска, где сохабил скрадену льорнетку и удал ся до Хоржова.

Там арестовано єго на основі россланных за ним гончих листов за дезерцию. В слідстві признал ся до убийства, подаючи, же убил прото, жебы здобыти цивильну одеджу Гренду розстріляно.

Дня 27 січня бандыты напали на стацию Кенты — Подлесьє и по стерорызованю урядника зрабовали с касы 200 зл. и утекли в незнаном напрямі. Полиция, повідомлена о нападі, начала слідство.

С Варшавы доносят, же Польша замовила в Голяндии будову 2-ох подводных лодок.

Біч: В tych днях місточко Біч, в горлицком повіті числяче 4 тысячи населеня, достало електричне світло с проводов „Електрогаз“ в Мацині Малой.

Державный Банк Рольный, котрый в послідных часах не стягал припадающих до заплаты рат в дорозі екзекуции от селян, тепер выдал порученє стягання залежных рат в дорозі екзекуции. Внесеня екзекуцийны обыймут понад 60 тысяч селян.

Климковка — пов. Горлицы.

Дня 15-го лютого т. р. отбуде ся в Климковці пов. горлицкого

Обще Собрание

ЧЛЕНОВ ЧИТ. ИМ. М. КАЧКОВСКОГО, на котре запрашае всіх членов и доокрестну руску интеллигенцию.

Початок точно о год. 15.

По собраню отбуде ся представленє.

Секретар: Предсідатель:
В. Курилло-Гайдова В. Гудак

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,
НЕХАЙ ЯКНАЙСКОРШЕ

заасекурує ся
в асекураційном Товаристві
Вита и Краковске
во **ЛЬВОВІ**

Асекурацію принимают на цілой Лемковщині
представителі: гг. Осиф Яновицкый — Крыница-Село и Ми-
хаил Перелом — Сянок.